



CONVENIO DE COLABORACIÓN ENTRE A CONSELLERÍA DE POLÍTICA SOCIAL DA XUNTA DE GALICIA E A FUNDACIÓN CAMIÑA SOCIAL PARA LEVAR A CABO UNHA INTERVENCIÓN EDUCATIVA INTEGRAL CON PERSOAS MENORES QUE TEÑAN QUE CUMPRIR MEDIDAS XUDICIAIS E OUTRAS ACTUACIÓNS EN MEDIO ABERTO PREVISTAS NA LEI ORGÁNICA 5/2000, DO 12 DE XANEIRO, REGULADORA DA RESPONSABILIDADE PENAL DOS MENORES, NA PROVINCIA DE CORUÑA.

En Santiago de Compostela, 1 de setembro de 2016

Reunidos:

Dunha parte, D. José Manuel Rey Varela, conselleiro de Política Social da Xunta de Galicia, en nome e representación desta, en uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta de Galicia e da súa Presidencia, e de conformidade co disposto no Decreto 116/2015, do 4 de outubro, polo que se modifica a estrutura orgánica da Xunta de Galicia, o Decreto 126/2015, do 4 de outubro, polo que se lle nomea conselleiro de Política Social e o Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra parte, D. Antonio Campanón Sanjurjo con DNI nº 33321751H, como representante legal da Fundación Camiña Social con CIF G-27381797 e con domicilio social na Avenida da Coruña 345 entrechán local 7EC de Lugo, de acordo co establecido nos seus estatutos elevados a público en virtude de escritura outorgada en Lugo o día 17 de xuño de 2008 perante o notario Manuel Ignacio Castro-Gil Iglesias co número 1409 do seu protocolo, modificados en virtude de escritura pública de formalización de acordos outorgada 22 de outubro de 2013 perante o notario Manuel Ignacio Castro-Gil Iglesias co número de protocolo 2561 e inscritos no Rexistro de Fundacións de Interese Galego.

Ambas as dúas partes comparecentes recoñécense reciprocamente capacidade suficiente para o outorgamento do presente convenio de colaboración, e en consecuencia,

Expoñen:

Primeiro. Que a Consellería de Política Social, a través da Dirección Xeral de Familia, Infancia e Dinamización Demográfica, ten asumidas entre as súas competencias, segundo o artigo 13 do Decreto 176/2015, do 3 de decembro, a protección e tutela dos/as menores en situación de risco ou desamparo e a execución das medidas ditadas polos xulgados de menores, nos termos establecidos na Lei orgánica 5/2000, do 12 de xaneiro, reguladora da responsabilidade penal dos menores (en diante LORPM).

Fundación
CAMIÑA SOCIAL
C.I.F.: G-27381797





Segundo. Que a Fundación Camiña Social, constituída en virtude de escritura pública outorgada en Lugo o 17 de xuño de 2008 perante o notario Manuel Ignacio Castro-Gil Iglesias co número 1409 do seu protocolo, é unha entidade sen ánimo de lucro que figura inscrita no Rexistro Único de Entidades Prestadoras de Servizos Sociais da Consellería de Política Social co número E-5223.

Dentro do seus obxectivos prevé a protección da infancia, menores, inmigrantes e terceira idade de acordo co previsto na lexislación autonómica, estatal e internacional aplicable así como a prevención no ámbito da drogadicción e a delincuencia xuvenil, de menores e mozos en xeral, accións que teñen relación directa co obxecto do convenio.

Terceiro. Que ambas as dúas partes na súa actuación teñen en conta os principios recollidos na Convención dos Dereitos do Neno aprobada polas Nacións Unidas o 20 de novembro de 1989, o cumprimento da normativa estatal e autonómica sobre reforma de menores, as regras mínimas uniformes das Nacións Unidas para a Administración de Xustiza de Menores (reglas de Beijing), adoptadas pola Asemblea Xeral das Nacións Unidas o 29 de novembro de 1985, a Recomendación (87) 20 do Comité de Ministros do Consello de Europa, do 17 de setembro de 1987, sobre reaccións sociais ante a delincuencia xuvenil e o Ditame do Comité Económico e Social Europeo sobre a prevención da delincuencia xuvenil, modos de tratamento da delincuencia xuvenil e o papel da xustiza do menor na Unión Europea do 15 de marzo de 2006.

Cuarto. Que o artigo 45.3 da LORPM faculta ás comunidades autónomas para establecer os convenios ou acordos de colaboración necesarios con entidades privadas sen ánimo de lucro para a execución das medidas da súa competencia, baixo a súa directa supervisión, sen que elo supoña en ningún caso a cesión da titularidade e responsabilidade derivada de dita execución.

O artigo 88 da Lei 3/2011, do 30 de xuño, de apoio á familia e á convivencia de Galicia, atribúelle á Xunta de Galicia a potestade de celebrar convenios ou acordos de colaboración coas demais administracións, así como con outras entidades públicas ou privadas sen ánimo de lucro, para a execución das medidas da súa competencia, baixo a súa directa supervisión, de acordo cos principios de cooperación e colaboración, e sen que isto supoña cesión de titularidade ou responsabilidade.

Quinto. Que co fin de promover a concorrência pública e garantir os principios de publicidade, transparencia, obxectividade e non discriminación a Consellería de Política Social convocou un procedemento de selección de entidades privadas sen ánimo de lucro para levar a cabo unha intervención educativa integral con persoas menores que teñan que cumprir medidas xudiciais e outras actuacións de medio aberto previstas na LORPM na provincia da Coruña (DOG núm 33, do 18 de febreiro).

Sexto. Que unha vez resolto o procedemento, a Fundación Camiña Social resultou seleccionada para a colaboración coa entidade pública na execución das medidas xudiciais e outras actuacións de medio aberto na provincia de Coruña.

Por todo o exposto, a Consellería de Política Social e a Fundación Camiña Social acordan formalizar o presente convenio de colaboración de acordo coas seguintes

Fundación
CAMIÑA SOCIAL
C.I.F.: G-27381797





CLÁUSULAS:

Primeira. Obxecto e ámbito de aplicación

Este convenio ten por obxecto regular a colaboración entre a Consellería de Política Social e a Fundación Camiña Social para levar a cabo unha intervención educativa integral con menores que teñen que cumprir medidas non privativas de liberdade, denominadas de medio aberto, impostas polos xulgados de menores en virtude do artigo 7 da LORPM, ou que teñan que realizar tarefas e actividades de reparación extraxudicial previstas no artigo 19 da mencionada lei, no ámbito da provincia da Coruña.

A relación de medidas xudiciais a executar pola entidade son as seguintes:

Tratamento ambulatorio. Medida destinada aos menores que dispoñen das condicións axeitadas na súa vida para beneficiarse dun programa terapéutico que lles axude a superar procesos aditivos ou disfuncións significativas no seu psiquismo.

Asistencia a centro de día. As persoas sometidas a esta medida residirán no seu domicilio habitual e acudirán ao CIEMA a realizar actividades de apoio, educativas, formativas, laborais ou de ocio.

Permanencia fin de semana. Medida pola que a persoa menor se ve obrigada a permanecer no seu fogar dende a tarde ou noite do venres ata a noite do domingo, con excepción do tempo en que realice as tarefas socioeducativas asignadas polo/a xuíz/a que deban levarse a cabo fóra do lugar de permanencia.

Liberdade vixiada. Nesta medida tense que facer un seguimento da actividade da persoa sometida a ela e da súa asistencia á escola, ao centro de formación profesional ou ao lugar de traballo, segundo os casos, procurando axudala a superar os factores que determinaron a infracción cometida.

Convivencia con persoa, familia ou grupo educativo. É unha medida que intenta proporcionarlle á persoa menor un ambiente de socialización positivo, mediante a convivencia, durante un período determinado polo/a xuíz/a, cunha persoa, cunha familia distinta da súa ou con grupo educativo que se ofrezca a cumprir a función da familia no que respecta ao desenvolvemento de pautas socioafectivas prosociais no/a menor.

Prestacións en beneficio da comunidade. Consiste en realizar unha actividade, durante o número de sesións previamente fixado, ben sexa en beneficio da colectividade no seu conxunto ou de persoas que se atopen nunha situación de precariedade por calquera motivo. Esta actividade de xeito preferente busca relacionar a natureza da actividade en que consista a medida cos bens xurídicos afectados polos feitos cometidos polo menor.

Tarefas socioeducativas. Consiste en que a persoa menor leve a cabo actividades específicas de contido educativo que faciliten a súa reinserción social.

Fundación
CAMIÑA SOCIAL
C.I.F.: G-27381797





Así mesmo, correspóndelle á Fundación Camiña Social garantir a realización de tarefas e actividades de reparación extraxudicial previstas no artigo 19 da mencionada lei, no ámbito da provincia.

Segunda. Beneficiarios

Persoas menores que teñan que cumprir unha medida xudicial de medio aberto imposta polos xulgados de menores, recollida no obxecto do convenio, ou que teñen que realizar reparacións extraxudiciais ou actividades educativas propostas polos equipos técnicos dos xulgados de menores en virtude do artigo 19 da LORPM.

O termo "persoa menor" entenderase, como extensivo á totalidade daquelas persoas ás cales lles sexa aplicable algunha medida derivada da LORPM, independentemente de que alcanzasen ou non a maioría de idade no momento da súa execución, de acordo ao uso que do dito termo se dá na antedita lei.

Terceira. Principios inspiradores

A Fundación Camiña Social, na intervención cos menores, terá en conta os principios inspiradores da execución das medidas xudiciais recollidos na LORPM e no Real Decreto 1774/2004, do 30 de xullo, polo que se aproba o Regulamento da citada lei, así como as directrices e instrucións ditadas dende a Dirección Xeral de Familia, Infancia e Dinamización Demográfica que desenvolvan estes principios, primando fundamentalmente o carácter educativo dos programas, cunha intervención integral que abrangue aspectos educativos, formativos, familiares e sociais que favorezan o desenvolvemento harmónico da súa personalidade e a súa toma de conciencia polos feitos cometidos. Esta intervención desenvolverase nas fases e de acordo cos obxectivos, áreas, programas e metodoloxías recollidas no Proxecto de Intervención Educativa Integral presentado, que se incorporará como anexo ao convenio.

Cuarta. Obrigas

Da Consellería de Política Social:

- Remitir á Fundación Camiña Social toda a información relativa ás medidas para a súa execución.
- Realizar todas as actuacións administrativas que, de acordo coa súa competencia, lle correspondan na execución das medidas.
Elaborar circulares e instrucións que establezan un procedemento para a execución e seguimento das medidas de medio aberto, así como de soportes documentais que permitan un tratamento informático da información que garantan a unidade de expediente e a súa reserva.
- Contribuír ao financiamento das actividades obxecto deste convenio nos termos sinalados na cláusula quinta.



Fundación
CAMIÑA SOCIAL
C.I.F.: G-27381797




- Levar a cabo o seguimento e supervisión do traballo levado a cabo pola entidade .

Da entidade colaboradora:

- En relación coa persoa menor ou mozo.
 - Respetar os seus dereitos, tanto os que lle recoñecen as leis nacionais como as internacionais, así coma os dereitos que se deriven da execución da medida xudicial.
 - Xestionar con axilidade a documentación administrativa que as persoas menores precisen.
 - Realizar o acompañamento e asesoramento, garantindo que a intervención educativa que se realice responda a parámetros de calidade.
 - Garantir a alimentación e cubrir os gastos de transporte nos casos en que, pola súa situación sociofamiliar, proceda.
- En relación coa execución das medidas.
 - Aceptar a aquelas persoas menores que para a súa atención indiquen as xefaturas territoriais da Consellería de Política Social, constituíndo este último organismo o único con capacidade para derivalas.
 - Elaborar e presentar nos prazos recollidos legalmente un programa individualizado de execución de medida para cada persoa menor ou un modelo individualizado de intervención nos supostos de medidas de carácter preventivo.
 - Realizar as actuacións que correspondan de acordo co programa de execución aprobado, para o seguimento e execución definitiva da medida.
 - Elaborar os correspondentes informes de seguimento así como de incidencias, se as houber, co obxecto de manter informadas á autoridade xudicial e administrativa.
 - Presentar, cando se considere procedente, a proposta de revisión xudicial de medida ou medidas.
 - Asistir ás entrevistas, reunións, actos e dilixencias procesuais aos cales sexa convocada.
 - Actuar de xeito coordinado co persoal técnico, entidades ou servizos que participen na execución da medida.
 - Elaborar o informe final de valoración do proceso de execución e da situación na dita data da persoa menor.
 - Informar, en calquera momento e por petición do departamento da Xunta de Galicia competente na área de menores, sobre a evolución da situación das persoas menores ao seu cargo.

Fundación
CAMIÑA SOCIAL
C.I.E.: G-27381797





- Seguir as instrucións establecidas pola Dirección Xeral de Familia, Infancia e Dinamización Demográfica, así como das xefaturas territoriais da Consellería de Política Social, en relación coa execución das medidas xudiciais, e subministrar toda a información que lle sexa solicitada. En todo caso, será a xefatura territorial correspondente quen lle remita e/ou comunique ao xulgado de menores que impuxo a medida toda aquela documentación esixible ao abeiro da LORPM e do seu regulamento.
- Comunicar de xeito inmediato á Dirección Xeral de Familia, Infancia e Dinamización Demográfica da Consellería de Política Social así como ás súas xefaturas territoriais calquera incidencia relevante na execución da medida ou o seu incumprimento, así como todas aquelas circunstancias sobrevidas que puidesen orixinar irregularidades no desenvolvemento da actividade conveniada.
- Unha vez rematada a medida xudicial e feita a comprobación de que a persoa menor non vai ter que executar novas medidas impostas, a entidade colaboradora:
- Entregará á persoa menor toda a documentación de carácter persoal que lle pertenza.
- Destruirá todas as copias da documentación que elaborara ou que lle fose remitida pola Consellería de Política Social. A información que teña sobre a persoa menor en calquera soporte distinto do papel será destruída tamén conforme o disposto na normativa aplicable.
- Remitirá á xefatura territorial da Consellería de Política Social o resto da documentación orixinal, indicando expresamente que é para dar cumprimento ao establecido no apartado 6 do artigo 12 do Regulamento da LORPM.

• *En relación co persoal adscrito a execución das medidas.*

- Contar cun cadro de profesionais para a intervención educativa con alta cualificación técnica e humana en número suficiente para cubrir as ratios establecidas no Decreto 329/2005, do 28 de xullo, polo que se regulan os centros de menores e os centros de atención á infancia, coa composición e número determinados na memoria achegada pola entidade que se anexa ao presente convenio.

As características do persoal, modalidades de contratación, titulacións, experiencia laboral, horario etc. deben respectar o contido da devandita memoria.

Este persoal dependerá exclusivamente da entidade conveniada a cal terá todos os dereitos e deberes inherentes a súa condición de empregadora respecto daquel, á entidade responsable corresponderalle a súa dirección técnico-educativa e organización. A Administración será de todo allea ás relacións entre o persoal e a entidade colaboradora. Por conseguinte, en ningún caso o referido persoal poderá alegar dereito ningún en relación coa Administración nin esixirlle a esta responsabilidade de calquera clase como consecuencia das obrigas existentes entre a entidade conveniada e o seu persoal.

Fundación
CAMIÑA SOCIAL
C.I.F.: G-27381797





En ningún caso a sinatura do convenio suporá a existencia dunha relación funcional ou laboral entre a Administración e o persoal que a entidade achegue para levar a cabo unha intervención educativa integral con menores que teñen que cumprir medidas de medio aberto.

A extinción do convenio non poderá producir en ningún caso a consolidación das persoas que realizen os traballos obxecto do convenio como personal da Xunta de Galicia.

- A cobertura, en todo momento, dos postos de traballo e das correspondentes funcións. En consecuencia a entidade efectuará ao seu cargo e inmediatamente as substitucións necesarias do persoal que teña asignado á actividade, sexa cal for a súa causa, de forma que a execución das medidas xudiciais quede sempre asegurada. As variacións que se produzan no cadro de persoal serán inmediatamente comunicadas á Dirección Xeral de Familia, Infancia e Dinamización Demográfica para a súa autorización, acompañando a documentación acreditativa da titulación e do curriculum profesional. O cambio debe ser excepcional e expresamente motivado e respectar o mínimo esixido neste convenio.
 - Garantir a retribución axeitada do seu persoal, asumindo de forma directa e non trasladable á Administración o custo de calquera mellora nas condicións de traballo e /ou nas súas retribucións, xa sexa como consecuencia de convenios colectivos, pactos ou acordos de calquera índole, de xeito que en ningún caso, poderá repercutir as referidas modificacións sobre o importe que se facturará.
 - Garantir a calidade técnica (titulación, formación e aptitude profesional) do persoal que leva a cabo a intervención, sendo o seu cargo a formación e promoción precisa para asegurar a calidade desta.
 - O cumprimento respecto do persoal da entidade, da normativa laboral, de Seguridade Social e de prevención de riscos laborais e seguridade e saúde no traballo que se encontre vixente en cada momento.
- No suposto de que sexa obrigatoria a subrogación do persoal por estar así establecido nos convenios colectivos vixentes, estarase ao disposto neles.
- O cumprimento do disposto nas normas vixentes en caso de accidente ou prexuízo de calquera índole ocorrido ao persoal con ocasión do exercicio do seu cometido, baixo a súa responsabilidade, sen que esta alcance de modo ningún á Administración.
 - Aplicar criterios de mobilidade do persoal para reforzar as distintas áreas ou zonas segundo as necesidades de intervención educativa en cada momento.
 - Informar e formar ao persoal nas obrigas que dimanán da lexislación aplicable en materia de protección de datos de carácter persoal.

Fundación
CAMIÑA SOCIAL
C.I.F.: G-27381797





- Desenvolver con carácter anual o plan de formación presentado pola entidade. As accións anuais que se desenvolverán neste plan deben enviarse á Dirección Xeral de Familia, Infancia e Dinamización Demográfica con 3 meses de antelación á súa posta en marcha.

• *En relación coa intervención educativa.*

- a) Planificar a intervención educativa na provincia con base ao establecemento de áreas ou zonas de intervención que permitan o desenvolvemento das actuacións na propia contorna familiar e social da persoa menor.
- b) Levar a cabo a intervención educativa de acordo co proxecto de Intervención educativa integral para a execución das medidas xudiciais en medio aberto presentado pola Fundación Camiña Social, que se anexa ao convenio.
- c) Preparar e xestionar os medios e recursos necesarios para o óptimo desenvolvemento das actividades e programas.

Para os supostos de desenvolvemento de tarefas e actividades de reparación extraxudicial, a intervención educativa atenderá ás indicacións que sobre este particular indique o equipo técnico do xulgado de menores correspondente.

• *En relación co CIEMA.*

- Contar cun Centro de Intervención Educativa en Medio Aberto (CIEMA) situado na cidade da Coruña, denominado CIEMA CORUÑA, con capacidade mínima para executar simultaneamente 12 medidas xudiciais de asistencia a centro de día, que constitúe punto de atención e referencia para o cumprimento das restantes medidas xudiciais en medio aberto coas características e recursos indicados na memoria presentada pola entidade que se anexa a este convenio.


Este centro deberá cumprir os requirimentos establecidos no Decreto 329/2005, do 28 de xullo, polo que se regulan os centros de menores e os centros de atención á infancia.

- Garantir a plena dispoñibilidade do dereito de uso e goce do inmovible durante a vixencia do convenio.

Contar coas autorizacións esixibles segundo a normativa vixente, así como coas medidas de protección e seguridade precisas, as cales serán, en todo caso, adecuadas ás condicións estruturais e das instalacións. Estas autorizacións deberán estar expostas durante o desenvolvemento da actividade nun lugar visible ao público.

- Manter, conservar e coidar o local, asumindo a totalidade dos gastos de equipamento e de mantemento do inmovible (auga, luz, gas, limpeza, etc).
- Dispor do servizo de mantemento e limpeza preciso para o bo funcionamento.

Fundación
CAMIÑA SOCIAL
C.I.F.: G-27381797





- Presentar no prazo de dous meses dende a sinatura do convenio o Plan de prevención de riscos laborais e o Plan de actuación para casos de emerxencias, que deberán ser coñecidos por todas as persoas, tanto menores como profesionais. Os planos de evacuación estarán permanentemente expostos en lugar visible.
- Presentar no prazo de dous meses dende a sinatura do convenio un regulamento de réxime interno, que estará exposto no CIEMA nun lugar visible ao público, e que contará como mínimo coas normas de funcionamento, dereitos e deberes das persoas usuarias e órganos de representación e participación.
- Contar cun libro de rexistro de persoas usuarias e cun expediente individual de cada menor.
- Dispor dun libro de reclamacións, segundo o modelo aprobado, debidamente dilixenciado, e dunha caixa de suxestións, de cuxa existencia se deberá informar nun lugar visible ao público.
- Expor, nun lugar visible ao público, o organigrama do persoal adscrito á execución das medidas.
- Ter un horario de apertura durante toda a semana de 8:00 a 20:00 horas e contar coa presenza como mínimo dunha persoa educadora no centro. Nas fins de semana contar cando menos cunha persoa do mesmo perfil localizable.


• *Outras obrigas*

- Facilitar o exercicio das facultades de comprobación, dirección e inspección da Administración acerca da actividade conveniada. En consecuencia, en canto teña relación co obxecto do convenio, a Administración poderá obter da entidade conveniada a documentación e información que considere oportuna, establecer os sistemas de control de calidade que se deberán empregar e levar a cabo ás inspeccións que considere pertinentes, e reservarse, para estes efectos, a facultade de efectuar as visitas que consideren necesarias para comprobar as condicións técnicas de execución da intervención, o cumprimento dos requisitos para desenvolver a actividade, o trato e a asistencia que reciben as persoas beneficiarias, así como o bo funcionamento e o cumprimento das obrigas contraídas. Poderá solicitar a comparecencia do persoal directivo da entidade e/ou das persoas menores usuarias do servizo. Así mesmo, a Administración está facultada para ditar as instrucións oportunas para o estrito cumprimento do convenio.

A entidade acatará exacta e inmediatamente as ordes e instrucións que lle dite a Administración para a execución da actividade.

- Asumir todos os gastos que se produzan por desprazamento do persoal, tanto para a intervención coas persoas menores como para a busca de recursos que fagan posible a execución do contido das medidas.

Fundación
CAMIÑA SOCIAL
C.I.F.: G-27381797





- Garantir a execución das medidas, establecendo, de acordo coa lexislación vixente en materia laboral, as quendas e substitucións precisas en caso de baixa e nos períodos de vacacións, festivos, etc. da persoa titular.
- Xustificar as pólizas de seguros e o pagamento da prima cada vez que corresponda renovar dita póliza
- Indemnizar os danos que se causen a terceiras persoas como consecuencia das operacións que requira a actividade, excepto cando o dano fose producido por causas imputables á Administración.
- Cumprir a normativa vixente e cantas disposicións sobre protección e reeducación de menores dite a Xunta de Galicia e os seus órganos competentes no exercicio das súas atribucións.
- Desenvolver e executar todas aquelas instrucións, circulares, protocolos, etc. emitidas en relación coa actividade obxecto de convenio, pola Dirección Xeral de Familia, Infancia e Dinamización Demográfica para unha mellor organización e seguimento da actividade desenvolvida.
- Remitir mensualmente á xefatura territorial da Coruña a folia de ocupación debidamente cuberta segundo o modelo establecido na Circular 13/2008 que regula o procedemento de actuacións para a execución de medidas xudiciais en medio aberto impostas polos xulgados de menores e os programas educativos que as desenvolven.
- Elaborar unha memoria anual e os informes de seguimento da actividade desenvolvida que se lle indiquen por parte do persoal técnico da Dirección Xeral de Familia, Infancia e Dinamización Demográfica.

A memoria anual será presentada á Dirección Xeral de Familia, Infancia e Dinamización Demográfica durante o primeiro trimestre do ano seguinte ao que corresponde e conterá a descrición e análise cuantitativo e cualitativo de todas as actuacións desenvolvidas durante ese ano.

Ademais presentarase anualmente a explotación estatística dos datos conforme, entre outros, aos seguintes epígrafes que serán, en todos os casos, desagregados por sexo:

- a) Número de persoas menores atendidas, clasificadas por medidas e segundo os seguintes tramos de idade: 14-15, 16-17, 18-21 e de 21 anos en diante.
- b) Idade, nacionalidade e etnia das persoas menores infractoras atendidas.
- c) Tipoloxía das medidas en relación cos delitos cometidos.
- d) Tipoloxía dos delitos cometidos e medidas aplicadas.
- e) Nivel de escolarización e/ou formación e características sociofamiliares.
- f) Participación nos distintos programas e actividades socioeducativas.

Fundación
CAMIÑA SOCIAL
G.I.F. G-27381797





- g) Contactos e entrevistas realizadas coa familia da persoa menor.
- h) Índice de reincidencia e perfil das persoas reincidentes (idade, nacionalidade, etnia, nivel de escolarización e/ou formación e características socio-familiares).

- Contar coa autorización da Dirección Xeral de Familia, Infancia e Dinamización Demográfica para dar publicidade en calquera soporte das intervencións realizadas ao abeiro do convenio (publicacións, estatísticas, memorias, etc).
- Contar coa autorización da Dirección Xeral de Familia, Infancia e Dinamización Demográfica para a organización de eventos (seminarios, congresos, xornadas, etc) así como a presentación de relatorios, comunicacións e outros nos que se traten temas directamente relacionados coa actividade obxecto do convenio.
- Colaborar coa administración na investigación, estudo e desenvolvemento de programas relacionados coa delincuencia xuvenil en Galicia.
- Incorporar en todo o material e documentación xerada polo programa o logotipo da identificación corporativa da Xunta de Galicia.

Fundación
CAMIÑA SOCIAL
C.I.E.: G-27381797

Quinta. *Compromisos económicos e forma de pagamento e xustificación*

A Fundación Camiña Social percibirá da Consellería de Política Social con cargo aos orzamentos aprobados para estes fins unha compensación polos gastos en que incorra no desenvolvemento do convenio de 627.740,96 euros, que en ningún caso supón un beneficio económico para a entidade conveniada.

A dita compensación será satisfeita por meses vencidos, logo da xustificación dos gastos mediante a factura correspondente.

Para o aboamento da compensación a entidade colaboradora presentará á Dirección Xeral de Familia, Infancia e Dinamización Demográfica da Consellería de Política Social, dentro dos cinco días seguintes ao mes en que levou a cabo a actividade conveniada, os seguintes documentos:

- a) A factura correspondente conforme ao establecido no Real Decreto 1619/2012, do 30 de novembro, polo que se aproba o Regulamento polo que se regulan as obrigas de facturación.
- b) Certificado da entidade onde conste o persoal que leva a cabo a actividade ordenado por grupo profesional e posto de traballo, especificando o nome e apelidos, número de afiliación á Seguridade Social, tipo de contrato e dedicación horaria.
- c) Copia dos TC1 e TC2 da Seguridade Social.
- d) Folla de atención mensual, asinada pola persoa responsable do CIEMA, onde constarán todas as persoas menores que estiveron executando unha medida no período facturado, especificando: nome e apelidos, data de nacemento, expediente xudicial, data de ingreso, data de fin de medida e movemento (permanencia, alta ou baixa).





A documentación sinalada nas letras b), e c), unha vez achegada coa primeira facturación do servizo, só é preciso remitila no caso de que sufra variación.

Para a presentación das facturas utilizarase como sistema preferente o sistema electrónico de facturación da Xunta de Galicia. Para máis información:

<http://conselleriadefacenda.es/factura> e <http://www.conselleriadefacenda.es/sicon>.

Sexta. *Confidencialidade*

Ambas as dúas partes garanten a total confidencialidade dos datos persoais e familiares aos que teñan acceso como consecuencia das actividades que se van realizar, de acordo co establecido na Lei orgánica 15/1999, do 13 de decembro, de protección de datos de carácter persoal, no Real Decreto 1720/2007, do 21 de decembro, polo que se aproba o Regulamento de desenvolvemento da Lei orgánica 15/1999, do 13 de decembro, e no artigo 12 do Real Decreto 1774/2004, do 30 de xullo, polo que se aproba o Regulamento da LORPM, que regula o expediente persoal do menor na execución da medida.

No seu cumprimento, a Secretaría Xeral Técnica da Consellería de Política Social, responsable do ficheiro Xestión de servizos sociais, regulado pola Orde do 15 de decembro de 2011, pola que se regulan os ficheiros de datos de carácter persoal (DOG nº 246, do 27 de decembro) autoriza á Fundación Camiña Social como encargada do tratamento, para que acceda aos datos de carácter persoal contidos no devandito ficheiro, para os únicos efectos da execución deste convenio.

A Fundación Camiña Social como encargada do tratamento tratará os datos de conformidade coas instrucións do responsable do ficheiro e só coas finalidades e os usos exclusivamente precisos para a execución deste convenio, polo que non poderán ser usados para un fin distinto. En particular deben prestar cumprimento ás previsións establecidas para o ficheiro de Servizos Sociais incluído no Anexo I da Orde do 15 de decembro de 2011. Os datos persoais aos que teña acceso a encargada do tratamento non serán comunicados a terceiros, nin sequera para a súa conservación.

A responsable do ficheiro, e, de ser o caso, a encargada do tratamento deberán adoptar as medidas de índole técnica e organizativas precisas que garantan a seguridade dos datos persoais e eviten a súa alteración, perda, tratamento ou acceso non autorizados. A Orde do 15 de decembro de 2011 dispón que o ficheiro ten un nivel de seguridade alto, polo tanto será precisa a aplicación das medidas de seguridade previstas no título VIII do Real Decreto 1720/2007, do 21 de decembro.

A encargada do tratamento poderá subcontratar os servizos de auditoría e consultoría necesarios para garantir a adecuación do tratamento dos datos á Lei orgánica 15/1999, do 13 de decembro, nos termos establecidos no artigo 21.2 do Real Decreto 1720/2007. A empresa subcontratada pasa a ter a condición de encargada do tratamento e queda obrigada igualmente ao cumprimento das instrucións estipuladas pola responsable do ficheiro para a encargada do tratamento. Adoptará as medidas técnicas e organizativas necesarias para garantir a

Fundación
CAMIÑA SOCIAL
C.I.E: G-27381797





seguridade, integridade e confidencialidade dos datos de carácter persoal tratados conforme ao disposto na Lei orgánica 15/1999, do 13 de decembro, e o Real decreto 1720/2007, do 21 de decembro.

Unha vez finalizada a vixencia do convenio, os datos de carácter persoal deberán ser destruídos ou devoltos á responsable do ficheiro, ao igual que calquera soporte ou documento en que conste algún dato de carácter persoal obxecto de tratamento. Porén non procederá a destrución dos datos cando exista unha previsión legal que exixa a súa conservación; neste caso deberá procederse á súa devolución, garantindo ao responsable do ficheiro a dita conservación. A encargada do tratamento conservará os datos, debidamente bloqueados, en tanto puidesen derivarse responsabilidades da súa relación coa responsable do ficheiro.

A obriga de confidencialidade subsistirá aínda despois da finalización do convenio.

A encargada do tratamento responderá directamente ante a Axencia Española de Protección de Datos dos incumprimentos que se poidan derivar das condicións anteriores.

Sétima. *Comisión mixta de seguimento*

Para o seguimento do presente convenio constituirase unha Comisión Mixta á cal serán sometidas todas as cuestións derivadas do seu desenvolvemento e que non foran recollidas nel ademais de, con carácter previo, aquelas que impliquen desconformidade por algunha das partes asinantes.

Esta comisión está composta por :

- O representante legal da entidade ou persoa en que delegue.
- A Directora Xeral de Familia, Infancia e Dinamización Demográfica ou persoa en quen delegue.

Actuará como secretario/a, con voz pero sen voto, un/unha funcionario/a da Dirección Xeral de Familia, Infancia e Dinamización Demográfica

A propia comisión acordará o seu calendario de reunións.

Oitava. *Vixencia e posibles prórrogas*

O presente convenio xurdirá efecto dende a data da súa sinatura ata o 31 de decembro de 2017 e poderá prorrogarse por acordo expreso das partes por períodos sucesivos, non superior cada un deles a un ano e ata un máximo de dous anos, todo iso condicionado á existencia de crédito axeitado e suficiente nos exercicios correspondentes.

No caso de que non se prorrogue o convenio por causas imputables á entidade conveniada, esta debe continuar coa actividade que viña desenvolvendo en tanto a administración non formalice un novo convenio con outra entidade.

Fundación
CAMINA SOCIAL
C.I.F.: G-27381797





Novena. *Causas de extinción*

Serán causas de resolución do presente convenio as seguintes:

- a) Expiración do prazo de vixencia.
- b) Mutuo acordo das partes outorgantes.
- c) O incumprimento dos compromisos e cláusulas do convenio.
- d) Imposibilidade sobrevida do obxecto do convenio

Décima. *Natureza xurídica e cuestións litixiosas*

O presente convenio terá carácter administrativo e rexeráse polo establecido nas súas cláusulas e, no seu defecto, polas prescricións do Real Decreto Legislativo 3/2011, do 14 de novembro, polo que se aproba o texto refundido da lei de contratos do sector público, para resolver as lagoas e dúbidas que se puidesen presentar.

A Administración gozará de todas as prerrogativas inherentes á natureza administrativa do convenio á hora de interpretar, modificar ou resolver as lagoas ou dúbidas que se puidesen presentar.

Correspóndelle á Consellería de Política Social a resolución de cantas cuestións litixiosas xurdan sobre a interpretación, modificación ou efectos do convenio, poñendo os seus acordos fin á vía administrativa, cabe contra eles recurso contencioso-administrativo segundo o disposto no artigo 46 da Lei 29/1998, do 13 de xullo, reguladora da xurisdición contencioso-administrativa.

Para tales efectos, o tribunal competente será o Tribunal Superior de Xustiza de Galicia. Porén, contra os actos da administración poderá interpoñerse recurso potestativo de reposición ante o mesmo órgano que os ditou, no prazo dun mes para actos expresos e de tres meses para os que non o sexan, segundo o disposto no artigo 116 da Lei 30/1992, do 26 de novembro, de réxime xurídico das administracións públicas e do procedemento administrativo común.

Décimo primeira. *Publicidade do convenio*

Este convenio será obxecto de publicidade de acordo co previsto na Lei 1/2016, do 18 de xaneiro, de transparencia e bo goberno. Asimesmo, incluírase no Rexistro Público de Convenios, de conformidade co Decreto 126/2006, de 20 de xullo, polo que se regula o Rexistro de Convenios da Xunta de Galicia.

A entidade asinante presta o seu consentimento para incluír e facer públicos os datos relevantes referidos aos convenios asinados no rexistro público de convenios creado polo Decreto 126/2006, do 20 de xullo.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal de Transparencia e Gobierno Aberto.

Fundación
CAMIÑA SOCIAL
C.I.F.: G-27381797





E, en proba de conformidade ambas partes asinan o presente convenio por cuadruplicado, no lugar e data expresados.


Pola Consellería de Política Social



Manuel Rey

José Manuel Rey Varela

Pola Fundación Camiña social



Fundación
CAMIÑA SOCIAL
C.I.F.: G-27381797

Antonio Campanón Sanjurjo